

## **BAB KETIGA**

### **METODOLOGI KAJIAN**

#### **3.1 Pendahuluan**

Kajian ini merupakan suatu tinjauan tentang pertimbangan hukum syarak di kalangan masyarakat dalam menentukan pendirian politik. Oleh itu, dalam bab ini akan dibincangkan tentang metodologi kajian yang merangkumi reka bentuk kajian yang dijalankan, populasi dan pemilihan sampel kajian. Perbincangan turut melibatkan penggunaan instrumen kajian yang mana menyentuh hal kesahan dan kebolehpercayaan, tatacara pengumpulan data dan penganalisan data yang besesuaian dengan tujuan kajian.

#### **3.2 Rekabentuk Kajian**

Rekabentuk yang digunakan dalam kajian ini adalah berbentuk kajian perpustakaan dan tinjauan. Melalui kajian perpustakaan, kajian ini bergantung kepada buku-buku fekah yang membantu penulis mendapatkan maklumat berkaitan dengan hukum syarak. Metode ini digunakan dalam bab kedua. Penyelidik juga mendapatkan maklumat tambahan tentang perkembangan program keislaman tersebut melalui sumber lain seperti akhbar harian. Maklumat-maklumat tersebut telah diperolehi daripada beberapa perpustakaan berikut:

- a) Perpustakaan Utama Universiti Malaya.
- b) Perpustakaan Akademi Pengajian Islam, Universiti Malaya, Kuala Lumpur.
- c) Perpustakaan Akademi Pengajian Islam, Universiti Malaya, Nilam Puri.
- d) Perpustakaan Awam Negeri Kelantan

Melalui kajian tinjauan pula, penyelidik perlu membuat pemerhatian dan pengumpulan data primer. Teknik yang digunakan untuk memungut data adalah melalui borang soal selidik.

### **3.3 Sampel Kajian**

Dalam penyelidikan ini, teknik persampelan yang digunakan ialah persampelan rawak mudah. Sampel kajian ialah penduduk pasir mas yang terdiri dari kalangan mereka yang berumur 21 tahun ke atas. Pemilihan responden yang berumur melebihi 21 tahun adalah disebabkan mereka merupakan individu yang layak untuk mengundi.

### **3.4 Instrumen Kajian**

Instrumen yang digunakan dalam kajian ini ialah borang soal selidik. Kajian ini menggunakan borang soal selidik dengan tujuan untuk melihat kefahaman responden terhadap konsep parti politik menurut Islam, penentuan parti politik menurut Islam dan syarat-syarat untuk menjadi pemimpin menurut Islam.

### **3.5 Tatacara Pemerolehan Data**

Kajian yang menggunakan kaedah soal selidik perlu mempertimbangkan ketidakpastian dalam menerima maklumbalas daripada responden. Ketidakpastian ini wujud dari segi individu yang menjawab soal selidik dan pengutipan semula soal selidik. Dalam kajian ini soal selidik dihantar secara peribadi.

### 3.6 Rekabentuk Soal Selidik

Soal selidik direka sendiri oleh penyelidik berpandukan kajian lepas, rangka kerja konsep dan objektif kajian. Soalan yang dikemukakan adalah ringkas, tepat dan mudah difahami. Soal selidik lengkap adalah seperti di Lampiran A. Struktur soal selidik terdiri daripada 4 bahagian iaitu bahagian A, B, C dan D. Secara amnya struktur soal selidik yang digunakan adalah seperti berikut:

- a) Bahagian A – Latar belakang responden
- b) Bahagian B – Konsep Parti Politik (Pemahaman Politik Islam)
- c) Bahagian C – Penentuan Parti Politik
- d) Bahagian D – Syarat-syarat untuk Menjadi Pemimpin Menurut Islam

Soalan dalam bahagian A melibatkan data nominal berkaitan latar belakang responden iaitu umur, status, pekerjaan, tahap pendidikan, aliran sekolah dan aliran pendidikan. Dalam bahagian B, C dan D, data yang dikumpul berbentuk nisbah dan diukur dengan skala Likert berskala 1 hingga 5 iaitu dari sangat tidak setuju sehingga sangat setuju. Kandungan soal selidik ditunjukkan dalam jadual 3.1

JADUAL 3.1 Kandungan Soal Selidik

<b>Bahagian</b>	<b>Konstruk yang Diukur</b>	<b>Bil. Item</b>	<b>Item</b>
Bahagian A	Latarbelakang responden	6 item	1-6
Bahagian B	Konsep Parti Politik	15 item	1-15
Bahagian C	Penentuan Parti Politik Menurut Islam	12 item	1-12
Bahagian D	Syarat-syarat untuk Menjadi Pemimpin Menurut Islam	6 item	1-6

### **3.7 Tatabara Penganalisisan Data**

#### **i. Analisis Diskriptif**

Borang-borang soal selidik yang lengkap, diproses dengan menggunakan program *Statistical Package for the Social Sciences (SPSS)*. Dalam kegiatan penyelidikan kuantitatif, analisis diskriptif digunakan untuk menganalisis sampel kajian secara khusus di mana ia bukan bertujuan untuk mengaplikasi kes-kes kajian terhadap pihak lain secara menyeluruh. Data dianalisis untuk mendapatkan kekerapan, purata, peratus dan sebagainya bertujuan untuk menerangkan pandangan responden dalam menentukan pendirian politik samada mengikut hukum syarak atau sebaliknya. Dengan itu, analisis diskriptif digunakan untuk melihat profil responden dari segi pandangan mereka terhadap pemakaian hukum syarak terutamanya dari segi taburan kekerapan dan peratus.

Untuk melihat perhubungan dan perbezaan antara pandangan masyarakat terhadap pemakaian hukum syarak dengan latarbelakang responden, ujian  $\chi^2$  (Khi Kuasa Dua) dan Ujian Analisis Varians (ANOVA) dijalankan. Bagi angkubah-angkubah yang terdapat perhubungan, analisis lanjutan akan dilakukan untuk melihat kumpulan mana yang lebih menerima atau menolak konsep parti politik menurut Islam.

#### **ii. Analisis Crosstab**

Kaedah crosstab digunakan untuk mengetahui hubungan antara angkubah diri responden dengan angkubah pemilihan parti, penentuan parti dan syarat-syarat menjadi pemimpin. Tahap pengujian yang dijalankan ialah pada 0.05 (95 peratus

selang keyakinan)<sup>77</sup>. Jika nilai khi kuasa dua ( $\chi^2$ ) yang dicatatkan berada di bawah 0.05, ini bermakna terdapat perhubungan pada dua angkubah yang dikaji.

### iii. Analisis Varians (ANOVA)

Ujian Analisis Varians (ANOVA) digunakan untuk melihat perbezaan antara pembolehubah yang dikaji terutamanya bagi melihat perbezaan latarbelakang responden dan kesannya ke atas penerimaan masyarakat. Dalam kaedah ini, tahap pengujian yang ditetapkan ialah pada paras keertian 0.05 (pada selang keyakinan 95%). Jika nilai yang dicatatkan adalah berada di bawah 0.05, ini bermakna terdapat perhubungan dalam pandangan masyarakat mengikut latarbelakang masing-masing.

Bagi angkubah-angkubah yang mempunyai perbezaan, analisis lanjutan akan dilakukan untuk melihat berapa besar perbezaan terhadap pandangan masyarakat dan dapat menentukan kumpulan mana yang lebih menerima atau menolak pemakaian hukum syarak dalam menentukan pendirian politik.

Skala pengukuran yang digunakan untuk mentadbir soal selidik dan tujuan pengukuran terhadap isu-isu yang dikaji ini adalah menggunakan skala Likert yang diberi mata dari 1 hingga 5<sup>78</sup> berdasarkan kepada tahap penerimaan responden terhadap isu-isu atau perkara yang dikaji. Pemberian skor mata adalah seperti berikut:

1 = Sangat Tidak Setuju

2 = Tidak Setuju


---

<sup>77</sup> Levin, R.I & Rubin, D.S (2000), *Statistik untuk Pengurusan*, Susila Munisamy & Halimah Awang (terj), Petaling Jaya: Prentice Hall, h. 496-497

<sup>78</sup> Runyon, R. P & Andrey, H (1988), *Fundamental of Behavioral Statistics*, Sixth Edition, New York: Random House, h. 53-57, Lohman Brooks, R.S (1995), *Statistics in the Behavioral Sciences Conceptual Introduction*, Pacific Grove: Cole Publishing Company, h. 11, Bluman, A.G (1997), *Elementary Statistics: A Step by Step Approach*, Third Edition, Boston: McGraw-Hill, h. 23-34

- 3 = Setuju
- 4 = Sangat Setuju
- 5 = Amat Setuju

Berdasarkan kepada mata skor yang digunakan, maka kepencongan ke kiri atau ke kanan sesuatu isu yang dikaji itu boleh dilihat dan dinilai. Jika purata mata yang dicatatkan berada di bawah 3 (sederhana setuju), ini menunjukkan bahawa kepencongan adalah ke kiri atau kurang bersetuju terhadap persoalan yang dikaji. Sebaliknya jika nilai purata yang dicatatkan berada di atas 3 (sederhana setuju), kepencongan adalah ke kanan atau ke arah yang lebih bersetuju terhadap isu-isu yang dikaji. Jika nilai yang dicatatkan itu berada di sekitar 3, maka ia berada pada tahap sederhana setuju.



Beberapa soalan akan digabungkan untuk mendapatkan gambaran secara keseluruhan terhadap sesuatu isu atau persoalan yang dikaji. Perjumlahan (compute) dilakukan adalah bertujuan untuk memberikan gambaran yang mudah dan cepat tentang kepencongan penerimaan masyarakat terhadap sesuatu isu yang dikaji secara keseluruhannya. Di dalam menentukan tahap penerimaan responden terhadap sesuatu item, maka prosedur pengkelasan adalah berdasarkan nilai skor yang diperolehi. Kaedah pengkelasan yang digunakan adalah seperti prosedur berikut:

$$\text{Selang Kelas} = \frac{\text{Skor Maksimum} - \text{Skor Minimum}}{\text{Bilangan kelas yang dikehendaki}}$$

Contoh bagi soalan bahagian B berkenaan dengan ‘pemilihan parti politik’, penentuan kelas bagi tahap pandangan responden adalah ditentukan seperti berikut:

- i. Bilangan soalan di dalam bahagian ini ialah 15
- ii. Bilangan kelas yang dikehendaki ialah 5

Maka;

$$\text{Skor Maksimum ialah} \quad 15 \times 5 = 75$$

$$\text{Skor Minimum ialah} \quad 15 \times 1 = 15$$

Maka, Selang Kelas ialah:

$$\text{Selang Kelas} = \frac{\text{Skor Maksimum} - \text{Skor Minimum}}{\text{Bilangan kelas yang dikehendaki}}$$

$$\text{Selang Kelas} = \frac{75 - 15}{5} = 12$$

Maka tahap pandangan responden terhadap konsep pemilihan parti menurut Islam boleh dikelaskan seperti di bawah:

<b>Tahap Penerimaan Responden</b>	<b>Skor</b>
Sangat Tidak Setuju	15 hingga 26
Tidak Setuju	27 hingga 38
Setuju	39 hingga 50
Sangat Setuju	51 hingga 62
Amat Setuju	63 hingga 75

Berdasarkan tahap ini, maka kepencongan atau tahap sesuatu perkara itu boleh dinilai dengan menggunakan kekerapan, peratus serta purata mata keseluruhan. Jika

kekerapan, peratus dan purata mata yang dicatatkan adalah besar bagi sesuatu item, maka secara umumnya tahap penerimaan responden adalah tinggi. Dalam kes konsep penentuan parti menurut Islam, purata skornya adalah 53.1 (70.8%) sebagaimana yang diperolehi daripada analisis data, maka kepencongan penerimaan adalah berada dalam tahap sangat setuju seperti yang ditunjuk di bawah:

Sgt tdk setuju	Tdk setuju	Setuju	Sgt setuju	Amat Sgt setuju
15	27	39	51	63
(1)	(2)	(3)	(4)	(5)

### 3.8 Kesimpulan

Bab ini menjelaskan metodologi kajian yang meliputi reka bentuk kajian, instrumen kajian sehinggalah prosedur penganalisaan data. Reka bentuk utama kajian ini adalah kaedah tinjauan yang menggunakan soal selidik untuk mendapatkan maklumat daripada responden berkaitan dengan konsep parti politik, penentuan parti politik menurut Islam dan syarat-syarat untuk menjadi pemimpin menurut Islam. Soal selidik direkabentuk berdasarkan analisis kajian lepas dan objektif kajian. Soal selidik tersebut mengumpulkan data yang berbentuk nominal dan sela. Pembolehubah sela diukur secara skala Likert berdasarkan soalan-soalan yang mempunyai kaitan langsung dengan setiap pembolehubah. Analisis utama yang digunakan ialah analisis Khi kuasa dua.